

दिनांक 05.10.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- मुख्यमंत्री भजनलाल शर्मा कया-प्रदेश मांय नौजवानां रा कौशल विकास खातर विदेशी भाषावां रा स्कूल खोल्या जावेला।
- राजस्थान रोडवेज मांय 128 नई ब्लू लाइन बसां शामिल-दूर-दराज रा हलका मांय बेहतर सेवावां पूग सकेला।
- जोधपुर मांय मारवाड़ फेस्टिवल काल सूं सरू।
- प्रदेश मांय मौसम रा मिज़ाज मांय फेरू बदलाव-कोटा, जोधपुर अर उदयपुर संभाग रा केई जिलां मांय मेह बरस्यो।

000

मुख्यमंत्री भजनलाल शर्मा कयो के प्रदेश रा नौजवानां ने न्यारा-न्यारा देशां मांय बोली जाबा वाळी भाषावां री जाणकारी खातर भाषाई स्कूल खोल्या जावेला। इण रे मार्फत मोट्यारा ने पर्यटन समेत न्यारा-न्यारा हलकां मांय रुजगार रा नुवा मौका मिल सकेला। श्री शर्मा आज जयपुर रा जामडोली रा केशव विद्यापीठ मांय राख्या अखिल भारतीय राष्ट्रीय शैक्षिक महासंघ रा 9वां अधिवेशन रा उद्घाटन जळसा ने सम्बोधित कर रिया हा। इण मौके वे कया के पर्यटन रा नजरिया सूं राजस्थान पूरा देश मांय अनूठो है अर उण री सरकार विकसित राजस्थान 2047 रा विजन रे तैत अनुसंधान, नवाचार अर नौजवानां ने मजबूत करबा री दिशा मांय, दूरदर्शी नीति बणा र काम कर री है।

मुख्यमंत्री जयपुर मांय ही एक दूजा सामाजिक कार्यक्रम मांय कया के राज्य सरकार उद्योग अर व्यापार ने बढ़ावो देबा खातर बेहतर अर सुरक्षित वातावरण तैयार कर री है। मुख्यमंत्री कया के राज्य सरकार हस्तशिल्प रा हुनर ने सम्मान देबा रे सागे ही, प्रदेश मांय उद्योग अर व्यापार ने बढ़ावो देबा खातर हर भांत री कोशिश कर री है।

000

रोडवेज रा बेडा मांय आज 128 नई ब्लू लाइन बसां भेली व्ही। **‘आपणी बस-राजस्थान रोडवेज’** नाम सूं सरू करी गई इण बसां ने मुख्यमंत्री भजनलाल शर्मा जयपुर री अमर जवान ज्योति सूं हरी झंडी दिखा र रवाना कर्या। नई बसां प्रदेश रा दूर-दराज रा हलकां अर गांवा तांणी आमजन ने बेहतर परिवहन सेवा मुहैया करावेला। इण मौके मुख्यमंत्री रोडवेज री वोल्वो, स्केनिया अर एसी बसां मांय यात्रियां ने सीट माथे खाबा-पीबा री चीजां मुहैया कराबा री सुविधा री सरूआत करी है। नई बसां प्रदेशभर रा 23 डिपो ने आवंटित करी गई है। इण सेवा सूं राज्य रा 25 गांवाई रास्ता माथे 169 ग्राम पंचायतां तांणी सीधी रोडवेज बसां री पहुंच व्हेला।

000

युवा कार्यक्रम अर खेल मंत्री डॉ. मनसुख मांडविया आज विश्व शिक्षक दिवस माथे नुवी दिल्ली मांय **फिट इंडिया संडे ऑन साइकिल अभियान** मांय भाग लीना। वणा मेजर ध्यानचंद स्टेडियम सूं

इंडिया गेट अर आरे-सारे रा हलकां मांय शिक्षकां, पढणियां अर दूजा लोगां रे सागे साइकिल रैली री अगुवाई करी।

श्री मांडविया बताया के आज देशभर मांय दस हजार पांच सौ सूं बत्ती ठोड़ां माथे फिट **इंडिया संडे ऑन साइकिल** राखी गई। वे कया के अबे लाखों लोग हर दीतवार ने खुद ने फिट रेहबा वास्ते साइकिल चलावे है।

000

भारतीय कॉर्पोरेट कार्य संस्थान रो कॉर्पोरेट सामाजिक उत्तरदायित्व माथे दूजो राष्ट्रीय सम्मेलन काल सूं नुवी दिल्ली मांय सरू व्हे रियो है। दो दिन रा इण सम्मेलन रो विषय है : **जनजातीय विकास के लिए कॉर्पोरेट सामाजिक उत्तरदायित्व उत्कृष्टता का सदुपयोग**। कॉर्पोरेट कार्य मंत्रालय रे मुजब इण सम्मेलन रो मकसद सरकारी पहल, कॉर्पोरेट रणनीतियां अर स्वदेशी ज्ञान रे बीच तालमेल बढाणो है। ओ सम्मेलन कॉर्पोरेट सामाजिक उत्तरदायित्व माथे संवाद खातर एक राष्ट्रीय मंच देवेला, जिण मांय छह उच्च स्तरीय विशेषज्ञ पैनल चर्चावां, एक लाइव सामाजिक नवाचार प्रयोगशाला अर एक जनजातीय सांस्कृतिक प्रदर्शनी भेळी व्हेला।

000

जोधपुर मांय सालाना मारवाड़ फेस्टिवल काल सूं राख्यो जावेला। दो दिन रा इण उत्सव मांय मारवाड़ री परम्परा, संस्कृति अर लोककला रो दरसाव करयो जावेला। पर्यटन महकमा अर जिला प्रशासन री कानी ऊं राख्या जा रिया इण आयोजन मांय बड़ी तादाद मांय देशी-विदेशी सैलाणी पूग रिया है।

000

भरतपुर मांय चाल री जसवंत प्रदर्शनी अर पशु मेळो आं दिनां परवान माथे है। 105 बरसां सूं राख्या जा रिया इण ऐतिहासिक मेळा मांय राजस्थान समेत आरे-सारे रा राज्यां सूं बड़ी संख्या मांय पशुपालक अर मिनख पूग रिया है। म्हाका खबरनवीस बतायो के मेळा मांय रोजीना सांस्कृतिक कार्यक्रम अर खेल होड़ा राख्यी जा रही है।

000

प्रदेश मांय चाल रिया सहकार सदस्यता अभियान रे तैत हाल ताई 1 हजार 682 पैक्स मांय शिविर राख्या गया है। इण दौरान सहकारिता महकमा ऊं जुड़्या काम कर आमजण अर सहकार बंधुआं ने राहत पूगाई जा री है। 15 अक्टूबर ताई चालबा वाळा इण अभियान मांय पैक्सविहीन ग्राम पंचायतां मांय **‘ग्रामीण सेवा शिविरां’** रे तैत गतिविधियां राखी जा री है। शिविर रे दौरान करीब दो लाख लोगां ने सहकारिता रा प्रस्तावित कानून री जाणकारी दी जा चुकी है। इण रे इतर पीएम किसान सम्मान निधि योजना, किसानां री आधार सीडिंग अर ई-के.वाई.सी. रा काम भी तुरत प्रभाव सूं कर्या जा रिया है।

000

जैसलमेर रेलवे स्टेशन माथे आज अमृत संवाद कार्यक्रम राख्यो गयो। उत्तर-पश्चिम रेलवे रा जोधपुर मंडल री कानी ऊं राख्या कार्यक्रम मांय यात्री सुविधावां मांय सुधार अर रेलवे स्टेशन रा विकास सूं जुड़्या मुद्दा माथे चर्चा करी गई। मंडल रेल प्रबंधक अनुराग त्रिपाठी बताया के कार्यक्रम रो लगस रेल प्रशासन अर जनता रे बीच संवाद थापित कर बेहतर सेवा मुहैया कराणो है।

000

चित्तौड़गढ़ मांय चाल रिया मीरा महोत्सव रा दूजा दिन आज नृत्य नाटिका री प्रस्तुति दी जा री है। काल सूं सरू व्हीया तीन दिन रा महोत्सव मांय संत मीरा री जिन्दगी अर वां रा भजन अर अध्यात्म माथे चर्चावां करी जा री है। महोत्सव मांय ओडीसी नृत्यांगना कुंजलता मिश्रा री भी प्रस्तुति व्हेला।

000

कृषि महकमो काश्तकारां ने फसलां री चोखी निपज खातर डीएपी खाद री ठोड़ सिंगल सुपर फास्टफेट ने काम मांय लेबा री सलाह दी गई है। महकमा रा संयुक्त निदेशक विनोद जैन बताया के रबी फसलां मांय डीएपी री ठोड़ माथे फासफोरस मिली खाद काम मांय लेबा सूं जमीन मांय सल्फर री पूर्ति व्हे सके है, जो तिलहनी अर दलहनी फसलां खातर फायदामंद है। वे बताया के सिंगल सुपर फास्टफेट मांय डीएपी रे मुकाबला मांय बत्ता पोषक तत्व है जो सस्तो भी है।

000

आदिवासी बाहुल्य सलूमबर जिला मांय चिकित्सा महकमो झोलाछाप डॉक्टरां रे खिलाफ खास अभियान चलायो है। महका री टीम बरोडा कस्बा मांय गैर-कानूनी रूप ऊं चलायी जा री क्लिनिक माथे छापो मार र झोलाछाप डॉक्टर ने पकड़्यो। ब्लॉक चिकित्सा अहलकार सम्पत मीणा बताया के क्लिनिक सूं बड़ी तादाद मांय इंजेक्शन, दवाईयां अर इलाज रा रिकॉर्ड जब्त कर्या गया।

000

चूरु मांय आज एक सड़क हादसा मांय तीन लोगां री मौत व्हे गयी अर दो जणा घायल व्हे ग्या। पुलिस रे मुजब ये लोग पंजाब रा रेहवासी हा अर सालासर बालाजी रा दर्शन कर लौट रिया हा। मामला री जांच करी जा री है।

000

प्रदेश सूं विदा व्हीयो मॉनसून एक र फेरु पलट र केई जिलां ने तरबतर कर रियो है। मौसम महकमा रे मुजब लारला 24 घंटां मांय चित्तौड़गढ़ रा कपासन मांय 33 मिलीमीटर, बाड़मेर रा धोरीमन्ना मांय 21 अर उदयपुर मांय 4 मिलीमीटर बिरखा दर्ज करी गई। वठी ने हाडौती रा भी केई जिलां मांय आज दोपहार पछे मौसम बदल्यो अर केई ठोड़ां माथे मेह बरस्यो। उदयपुर संभाग रा जिला मांय मौसम पासो पलट्यो अर केई ठोड़ां माथे बिरखा व्ही। सरहदी जिला श्रीगंगानगर मांय मौसम मांय आया बदलाव रे पाछे गर्मी रो असर कम व्हे गयो। वठे **बींझ वायला** हलका मांय ओळा पड़बा री खबरां हैं। महकमा रे मुजब बंगाल री खाड़ी मांय बण्या नया तंत्र रे कारण बिरखा री गतिविधियां आठ अक्टूबर ताई सक्रिय रह सके है।

000

वन्यजीव सप्ताह रे तैत प्रदेशभर मांय केई कार्यक्रम राख्या जा रिया है। इण ई कड़ी मांय आज भरतपुर रा कैवलादेव राष्ट्रीय उद्यान मांय आज स्कूली टाबरां री केई होड़ां राखी गई। इण मौके वां ने पर्यावरण ने बचाबा री सौगंध दिराई गई अर पॉलीथिन मुक्त समाज खातर जाग जगाई गई। वठी ने अक्टूबर म्हीनो आबा रे सागे ही उद्यान मांय पक्षियां री चहचहाट बढ़ गयी है। उद्यान रा डीएफओ मानस सिंह बताया के इण बरस चोखो मेह बरसबा सूं उद्यान री झीलां मांय खाबा-पीबा री कोई कमी नी है, जिण सूं स्थानीय पक्षियां रे सागे विदेशी पक्षियां री केई प्रजातियां हाल सूं ही निजर आ री है।

000